

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj: 7/10) na prijedlog Ministarstva za boračka pitanja, Vlada Zeničko-dobojskog kantona na 22. sjednici, održanoj dana 17.08.2015. godine, d o n o s i

## **ZAKLJUČAK**

### **I.**

Prihvata se Informacija o stipendiranju redovnog studija branilaca i članova njihovih porodica u studijskoj 2014/2015. godini Ministarstva za boračka pitanja.

### **II.**

Informacija iz tačke I čini sastavni dio ovog Zaključka.

### **III.**

Zaključak stupa na snagu danom donošenja.

**PREMIJER**

***Miralem Galijašević***

Broj: 02-\_\_\_\_\_/15.

Datum, 17.08.2015. godine

Zenica

DOSTAVLJENO:

1x Ministarstvo za boračka pitanja,

1x a/a.

**Bosna i Hercegovina  
Federacija Bosna i Hercegovina  
Zeničko-dobojski kanton  
MINISTARSTVO ZA BORAČKA PITANJA**

**I N F O R M A C I J A**  
**o stipendiranju redovnog studija branilaca i članova njihovih  
porodica u studijskoj 2014/2015.godini**

Zenica, juli 2015.godine

U politici poboljšanja socijalno-ekonomskog položaja branilaca i članova njihovih porodica na području Zeničko-dobojskog kantona, posebna pažnja pripada obrazovnoj politici, s obzirom da će u planiranju budućnosti obrazovni nivo ove kategorije određivati sposobnost istih da se uključe u proces rada odnosno rezultate koji će se radom ostvarivati.

## **DIO DRUGI - Normativna regulativa**

### **POGLAVLJE I - Zakonski propisi**

Ustavom Federacije BiH propisano je utvrđivanje obrazovne politike, uključujući donošenje propisa o obrazovanju i osiguranje obrazovanja u nadležnosti kantona.

Pravo na prioritet dodjele stipendije za studij pripadnika branilačke populacije kao pravo koje se ostvaruje na nivou kantona, regulisano je federalnim propisima i to:

- Član 7. Zakona o pravima branilaca i članova njihovih porodica ("Službene novine Federacije BiH" br. 33/04, 56/05, 70/07 i 9/10),

- Član 3. Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" br. 70/05, 61/06 i 9/10).

Dodjela stipendija braniocima i članovima njihovih porodica, u periodu na koji se odnosi ova Informacija vršena je na osnovu slijedećih kantonalnih propisa:

- Član 23. Zakona o dopunskim pravima branilaca i članova njihovih porodica ("Službene novine Zeničko-dobojskog kantona br. 1/14) prema kojem: "Branioci i članovi njihovih porodica, koji su srednje obrazovanje stekli u školama na području Bosne i Hercegovine, imaju pravo na dodjelu stipendije za redovni studij na visokoškolskim ustanovama, u skladu sa posebnim propisom koji donosi Vlada Kantona, a kojim se naročito utvrđuje visina novčanih sredstava za stipendiranje, uvjeti, način i postupak dodjele stipendija, kao i ostala pitanja od značaja za ostvarivanje ovog prava."

- Uredba o stipendiranju branilaca i članova njihovih porodica („Službene novine Zeničko-dobojskog kantona“ broj: 4/14).

### **POGLAVLJE II – Uredba o stipendiranju branilaca i članova njihovih porodica**

Uvođenjem Bolonjskog načina studiranja, Ministarstvo za boračka pitanja Zeničko-dobojskog kantona (u daljem tekstu: Ministarstvo) kao nosilac aktivnosti na dodjeli stipendija po Uredbi, opredjelilo se za stipendiranje redovnog studija prvog i drugog ciklusa.

U skladu sa odredbama Uredbe:

- Visina stipendije za prvu godinu studija iznosi 800,00 KM, a za drugu i ostale godine studija, te za prvu i drugu godinu drugog ciklusa iznosi 1.200,00 KM.

- Isplata stipendija se vrši u osam jednakih mjesečnih rata koje iznose za prvu godinu studija 100,00 KM, a za drugu i ostale godine studija 150,00 KM.

- Pravo na dodjelu stipendije imaju:

- a) dobitnici ratnih priznanja ili odlikovanja;
- b) ratni vojni invalidi;
- c) demobilizirani branioci koji su u periodu od 06.04.1992. do 23.12.1995. godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetno lice ili neposredno po punoljetstvu;
- d) članovi porodice šehida, poginulih, umrlih i nestalih branilaca i umrlih ratnih vojnih invalida;
- e) članovi uže porodice poginulih, umrlih ili nestalih dobitnika ratnog priznanja ili odlikovanja;
- f) djeca dobitnika ratnih priznanja ili odlikovanja - do navršene 30. godine života;
- g) djeca ratnih vojnih invalida - do navršene 30. godine života;

- h) djeca demobiliziranih branilaca koji su u periodu od 06.04.1992.godine do 23.12.1995.godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetna lica ili neposredno po punoljetstvu - do navršene 30. godine života;

Učesnici konkursa ne mogu biti kandidati iz alineje d) koji su navršili 35 godina života; alineja

- e) f) g) i h) koji su navršili 30 godina života.

- Pravo učešća na konkursu za dodjelu stipendije takođe nemaju kandidati koji su:

- a) studenti-apsolventi;
- b) u tekućoj studijskoj godini na istom ili drugom fakultetu ponovno upisuju istu godinu studija;
- c) koji su na vanrednom studiju
- d) koji primaju kredit ili stipendiju drugog davaoca;
- e) čiji prihod po članu domaćinstva prelazili iznos od 584,80 KM (80% prosječne neto plaće isplaćene u Kantonu u prethodnoj godini);
- g) upisali studij poslije navršene 25.godine života.

S tim u vezi odredbe tačke e) se ne odnose na kandidate - dijete šehida, poginulog, umrlog, nestalog branioca i umrlog ratnog vojnog invalida i dijete poginulog, umrlog ili nestalog dobitnika ratnog priznanja ili odlikovanja.

- Uz prijavu na konkurs kandidati dostavljaju sljedeću dokumentaciju:

- a) ovjerenu fotokopiju lične karte;
- b) dokaz o statusu branioca i člana njegove porodice;
- c) uvjerenje o prebivalištu;
- d) potvrdu o redovnom studiju;
- e) dokaz o ostvarenom uspjehu u prethodno završenoj školskoj/studijskoj godini (ovjerena kopija svjedočanstva /uvjerenje o ostvarenom prosjeku ocjena u predhodnoj studijskoj godini);
- f) ovjerena kućna lista;
- g) uvjerenje ili drugi dokaz o prosječnom prihodu za posljednja tri mjeseca za svakog punoljetnog člana domaćinstva sa kućne liste (za nezaposlene uvjerenje Biroa za zapošljavanje, a za lica koja se ne vode na evidenciji nezaposlenih kopija zdravstvene knjižice;
- h) izjavu da ne prima stipendiju po drugom osnovu.

Prijava na konkurs sa potrebnom dokumentacijom podnosi se općinskoj službi nadležnoj za poslove branilačko-invalidske zaštite u općini u kojoj kandidat ima prebivalište, odnosno, ukoliko se radi o povratniku u RS, u općini u kojoj ostvaruje prava iz branilačko-invalidske zaštite ili najbližoj općini na području Kantona.

- Izbor kandidata za dodjelu stipendija vrši se na osnovu liste prvenstva, sačinjene bodovanjem po slijedećim kriterijima:

- a) ostvaren uspjeh u prethodno završenoj školskoj/studijskoj godini;
- b) socijalno-ekonomska situacija;
- c) ratna priznanja, ratni staž i invaliditet roditelja.

- Pravo na dodjelu stipendije bez bodovanja imaju kandidati koji su: dobitnici ratnih priznanja ili odlikovanja; ratni vojni invalidi; demobilizirani branioci; djeca šehida, poginulih, umrlih, nestalih branilaca, poginulih, umrlih ili nestalih dobitnika ratnog priznanja ili odlikovanja, umrlih ratnih vojnih invalida, umrlih demobiliziranih branilaca i djeca ratnih vojnih invalida sa procentom invaliditeta 70% i više i student sa procentom invaliditeta 70% i više.

- Stipendija po Uredbi se dodjeljuje samo jednom kandidatu iz jednog porodičnog domaćinstva sa izuzetkom za kandidate - djecu šehida, poginulih, umrlih i nestalih branilaca, umrlih ratnih vojnih invalida i umrlih demobiliziranih branilaca.

## **DIO TREĆI - Dodjela stipendija u studijskoj 2014/2015.g.**

Stipendije u studijskoj 2014/2015.godini dodjeljivane su kandidatima izabranim po osnovu rezultata konkursa koje je raspisalo Ministarstvo u Dnevnom avazu dana 11.11.2014.god., a obavještanje o objavljenom konkursu je izvršeno i putem nadležnih općinskih službi za branilačko-invalidsku zaštitu, kantonalnih branilačkih organizacija, oglasne ploče i web stranice Kantona.

Za stipendiranje studenata branilaca i članova njihovih porodica u Budžetu Kantona za 2015.godinu planiran je iznos od 1.600.000,00 KM. Konkurs je raspisan prije donošenja Budžeta za 2015.godinu te istim nije preciziran ukupan iznos sredstava za ovu namjenu, nego je u skladu sa članom 27. Uredbe navedeno da će sredstva biti opredjeljena „u visini od (najmanje) 10% ukupnih budžetskih sredstava Ministarstva za boračka pitanja u 2015.godini“.

Iznos opredijeljenih budžetskih sredstava po općinama određen je na osnovu procentualnog učešća pripadnika branilačke populacije u odnosu na njihov ukupan broj u Kantonu, a prema zvaničnim podacima sa kojima je raspolagalo Ministarstvo.

U skladu sa članom 30. Uredbe ministar Ministarstva je donio Instrukciju za provođenje konkursne procedure za dodjelu stipendija studentima (prvog i drugog ciklusa visokog obrazovanja)- braniocima i članovima njihovih porodica za studijsku 2014./2015.godinu, sa obavezujućim hodogramom aktivnosti za sve nadležne službe Kantona i Ministarstva. Predstavnici Ministarstva su u vrijeme konkursne procedure (od 16.12. do 23.12.2014.god.) izvršili nadzor nad radom nadležnih službenika u općinskim službama za branilačko-invalidsku zaštitu Kantona i po potrebi davali dopunska obrazloženja istim. Takođe tom prilikom data je i dodatna instrukcija sa pojašnjenjima na tražene odgovore na postavljena pitanja u toku procedure. Metodom slučajnog uzorka izvršen je uvid i bodovanje aplikanata u svim općinama Kantona.

Sa izradom konačne liste i dostavljanjem iste u Ministarstvo (do 30.01.2015.godine) konkursna procedura stavljena je u stanje mirovanja sve do donošenja Programa utroška sredstava Budžeta Zeničko-dobojskog kantona za 2015.godinu planiranih u pozicijama Ministarstva za boračka pitanja, broj: 02-14-10383/15 od 05.05.2015.godine

Na osnovu sačinjene i dostavljene Ministarstvu Konačne liste, Ministarstvo obavještava nadležnu općinsku službu o broju odobrenih stipendija u ovisnosti od visine opredijeljenih sredstava ( 3 % od ukupnih sredstava se neraspoređuje, nego se ostavlja za preraspodjelu po okončanju žalbenog postupka) nakon čega općinska služba donosi rješenja o dodjeli stipendija izabranim kandidatima, u skladu sa članom 211. Zakona o upravnom postupku, odnosno rješenja o odbijanju ili odbacivanju zahtjeva za dodjelu stipendije u skraćenom postupku na osnovu člana 139. stav 1. i 2. Zakona o upravnom postupku.

O žalbama na rješenja općinskih službi rješavalo je Ministarstvo. Ukupan broj podnesenih žalbi bio je 63, od kojih je uvaženo 7 kao osnovane i istima su dodijeljene stipendije. 56 žalbi je odbijeno.

Po okončanju navedene procedure Ministarstva je uputilo općinskim službama Odluku sa popisima izabranih kandidata, kojima je Općinska služba izdala Rješenja o dodjeli stipendija za studijsku 2014/15.godinu. Po rješenjima, obaveza Ministarstva je da osigura sredstva za isplatu stipendija, a obaveza studenata je da redovno pohađaju nastavu i ovjere semestre.

Po dostavljenim pisanim i anonimnim predstavkama Ministarstvo je u saradnji sa Općinskim službama koje su kao prvostepeni organ izvršile dopunske provjere i nakon istih u tri slučaja poništile rješenja o dodjeli stipendije za studijsku 2014/15.godinu.

## **DIO ČETVRTI**

### **- Tabelarni pregled prijavljenih studenata i odobrenih stipendija sa komentarom**

Općinske službe za branilačko-invalidsku zaštitu Kantona zaprimile su **2289** zahtjeva za stipendije za studijsku 2014/2015. godinu. Pregled broja prijavljenih kandidata po općinama i kategorijama branilačke populacije prikazan je u tabeli broj 1., a u tabeli broj 2. prikazani su podneseni zahtjevi po godinama studija prvog i drugog ciklusa studiranja.

Pravo na stipendiju ostvarilo je ukupno **1455** studenata što je za **123** stipendija više u odnosu na predhodnu studijsku godinu i to iz gore navedenog razloga i samim umanjnjem sredstvima u budžetu za 2015. godinu na transferu stipendiranja studenata.

Pregled broja stipendista po općinama i kategorijama pripadnosti branilačkoj populaciji prikazan je u tabeli broj 3.

U tabeli broj 4. dat je pregled po godinama studija prvog i drugog ciklusa, u tabeli 5. data je rekapitulacija primljenih zahtjeva i odobrenih stipendija po općinama i kategorijama, u tabeli 6. ukupan i mjesečni iznos sredstava, a u tabeli broj 7. pregled odobrenih stipendija i sredstava po općinama i godinama od studijske 2004/2005.godine.

## **DIO PETI - Zaključna razmatranja**

Obrazovanje, kao dio obrazovne i socijalne politike našeg društva usmjereno na branilačku populaciju, dio je moralnog duga države prema populaciji, koji ona i putem stipendiranja studenata branilaca i članova njihovih porodica, pokušava da oduži i pruži zahvalnost istim za uloženo (život, dio tjela, zdravlje i dr.) odnosno urađeno za odbranu zemlje.

Imajući u vidu da su analize iz dosadašnjeg perioda dodjele stipendija pripadnicima branilačke populacije pokazale da je među stipendistima najveći broj onih koji su postigli dobar uspjeh u toku školovanja, te da se radi o porodicama koje se nalaze u stanju socijalne potrebe, smatramo da je stipendiranje branilaca i članova njihovih porodica u potpunosti opravdalo svoju svrhu.

Evidentno je da se iz godine u godinu povećava broj prijavljenih studenata na konkurs za dodjelu stipendija, što ukazuje na potrebu praćenja navedenog i povećanja budžetskih sredstava za ovu namjenu u narednim godinama, kako bi omogućili stipendiranje što većeg broja studenata, posebno sada kada je omogućeno da i studenti koji studiraju van granica Bosne i Hercegovine budu korisnici istih.

U ovom smislu poželjno je omogućiti dodjelu stipendija na nivou Zeničko-dobojskog kantona svim redovnim studentima pripadnicima branilačke populacije.

Također smatramo da je nužno još bolje uskladiti aktivnosti svih davalaca stipendija i kredita za školovanje na području Kantona i šire, a u cilju osiguranja visokog stepena koordinacije, kako bi se postigla pravedna raspodjela i što više studenata bilo obuhvaćeno ovim vidom pomoći.

### **Prilog:**

- tabele 1 do 7.

MINISTAR  
Fahrudin Čolaković